

Na osnovu člana 6. tačka d) Zakona o organizaciji penzijskog i invalidskog osiguranja Federacije Bosne i Hercegovine ("Službene novine Federacije BiH", broj 32/01 i 18/05) Upravni odbor Federalnog zavoda za penzijsko i invalidsko osiguranje na 27. sjednici, održanoj 29.07.2026. godine u Bihaću, donosi

**ODLUKU O VISINI DOPRINOSA ZA PENZIJSKO I INVALIDSKO OSIGURANJE ZA  
LICA OSIGURANA U ODREĐENIM OKOLNOSTIMA**

("Službene novine Federacije BiH", broj 62/26 od 12.8.2026.)

**Član 1.**

Doprinos za penzijsko i invalidsko osiguranje (u daljem tekstu: doprinos) za osigurana lica iz člana 17. Zakona o penzijskom i invalidskom osiguranju ("Službene novine Federacije BiH", broj 13/18 do 6/26 - u daljem tekstu: Zakon) utvrđuje se i plaća u mjesečnim iznosima:

|     |                                                                                                                                                                                                                                                                               |          |
|-----|-------------------------------------------------------------------------------------------------------------------------------------------------------------------------------------------------------------------------------------------------------------------------------|----------|
| a). | za vrijeme učešća u akciji spašavanja ili odbrane od elementarnih nesreća (požar, poplava, zemljotres i druge nesreće prouzrokovane višom silom) na teritoriji Federacije ili u akciji preuzetoj radi spašavanja života građana ili otklanjanja materijalne štete na imovini, | 3,00 KM  |
| b). | za vrijeme pružanja pomoći organima vlasti po njihovom zahtjevu,                                                                                                                                                                                                              | 4,00 KM  |
| c). | učenik ili student za vrijeme praktične nastave, odnosno za vrijeme stručne prakse kod poslodavca,                                                                                                                                                                            | 3,00 KM  |
| d). | za vrijeme obavljanja obaveznog rada prilikom izdržavanja kazne zatvora, maloljetničkog zatvora i za vrijeme izvršenja odgojne mjere u odgojnoj ustanovi, ustanovi za preodgoj ili u posebnoj odgojnoj ustanovi,                                                              | 3,00 KM  |
| e). | za vrijeme prekvalifikacije ili dokvalifikacije, u skladu sa zakonom,                                                                                                                                                                                                         | 3,00 KM  |
| f). | za vrijeme rada kod poslodavca bez zasnivanja radnog odnosa (volonterski rad), u skladu sa zakonom                                                                                                                                                                            | 30,00 KM |
| g). | za vrijeme obavljanja privremenih i povremenih poslova preko omladinskih zadruga do navršenih 26 godina života ako se nalazi na redovnom školovanju.                                                                                                                          | 30,00 KM |
| h). | za vrijeme vršenja određenih javnih funkcija ili građanskih dužnosti po pozivu nadležnih organa i organa jedinice lokalne samouprave,                                                                                                                                         | 60,00 KM |
| i). | lice sa teškoćama u razvoju za vrijeme stručnog osposobljavanja, nakon završenog osnovnog obrazovanja.                                                                                                                                                                        | 2,00 KM  |
| j). | za vrijeme učestvovanja na organiziranim sportskim natjecanjima.                                                                                                                                                                                                              | 3,00 KM  |

## **Član 2.**

Obaveznici obračuna i uplate doprinosa iz člana 1. stav 1. ove odluke su:

|    |                                |                                                      |
|----|--------------------------------|------------------------------------------------------|
| 1. | za lica iz tačke. a), b) i h). | - državni i drugi ovlašteni organi koji ih pozivaju: |
| 2. | za lica iz tačke c).           | - obrazovno-odgojne ustanove;                        |
| 3. | za lica iz tačke d).           | - kazneno-popravne ustanove;                         |
| 4. | za lica iz tačke e)            | - isplatilac plaće, odnosno novčane naknade:         |
| 5. | za lica iz tačke f) i i).      | - poslodavci kod kojih rade;                         |
| 6. | za lica iz tačke g).           | - društvene organizacije i omladinske zadruge:       |
| 7. | za lica iz tačke j).           | - organizatori sportskih takmičenja.                 |

## **Član 3.**

Obaveznici obračuna i uplate doprinosa iz člana 2. ove odluke, provodit će realizaciju iste na osnovu obračuna radnih dana u skladu sa članom 17. i 18. Zakona.

## **Član 4.**

Danom stupanja na snagu ove Odluke prestaje da važi Odluka o visini doprinosa za penzijsko i invalidsko osiguranje za lica osigurana u određenim okolnostima ("Službene novine Federacije BiH", broj 26/14).

## **Član 5.**

Ova Odluka stupa na snagu narednog dana od dana objavljivanja u "Službenim novinama Federacije BiH".